



Broj: 01/GV-05-11221/17

Datum: 31.07.2017.godine

U skladu sa ovlastima utvrđenim članom 9. Statutarne odluke Grada Cazina ("Službene novine Grada Cazina, broj:1/17), a u vezi sa predloženim Etičkim kodeksom kao osnovom političkog integriteta izabranih lokalnih i regionalnih predstavnika, predloženim od strane Kongresa lokalnih i regionalnih vlasti Vijeća Europe u 2000. godini, Gradsko vijeće Grada Cazina na III sjednici održanoj 31.07.2017. godine, utvrdilo je:

ETIČKI KODEKS IZABRANIH PREDSTAVNIKA VLASTI GRADA CAZINA

I – UVODNI DIO

Član 1.

1. Izabranici – vijećnici Gradskog vijeća i Gradonačelnik (u daljem tekstu: izabranici) kao neposredno izabrani predstavnici svih građana Grada Cazina uzajamno se obavezuju na poštivanje ovog Etičkog kodeksa (u daljem tekstu: Kodeks) sa ciljem opravdanja i jačanja javnog povjerenja kod građana, ličnog i političkog integriteta i autoriteta koji pripada Gradskom vijeću Grada Cazina (u daljem tekstu: GV) i njegovim izabranicima, te obavještenja javnosti o tome kakvo ponašanje može da očekuje od izabranika i pomoći u rješavanju njihovih eventualnih etičkih dilema.
2. Ovim Kodeksom izabranici u Gradu Cazinu žele da promovišu etičke principe i standarde svog ponašanja kojih će se pridržavati kako bi u domenu svog mandata djelovali u najboljem interesu svih građana u Gradu Cazinu.

II – PODRUČJE PRIMJENE

Član 2.

1. Kodeks se odnosi na izabranike Grada Cazina kao izabrane zastupnike građana na neposrednim i tajnim izborima.
2. Principi ponašanja ustanovljeni ovim Kodeksom će se primjenjivati i u izbornoj kampanji.

III – PRINCIPI PONAŠANJA

Član 3.

Usvajanjem ovog Kodeksa izabranici preuzimaju obavezu da će se, u cilju obavljanja svojih dužnosti u Gradu Cazinu i prema javnosti u cjelini, pridržavati principa prioriteta zakona i općeg interesa, integriteta, nesebičnosti, zabrane mita i korupcije, otvorenosti, poštenja i odgovornosti, izbjegavanja sukoba interesa, pravilnog upravljanja resursima, obaveze profesionalnog usavršavanja, izbjegavanje kumulacije pozicija, uzajamnog poštovanja i uvažavanja.

3.1. PRIORITET ZAKONA I OPĆEG INTERESA

1. U svom cjelokupnom djelovanju izabranici će poštovati prioritet zakona i općeg interesa, te će svoju aktivnost usmjeriti ka ostvarivanju javnog interesa i zastupati interese građana.
2. Izabranici će u svom djelovanju kontinuirano imati na umu da su oni izabrani predstavnici svih građana Grada Cazina, a ne jednog dijela – stranke.
3. Odluke i akcije podešavati isključivo u okviru propisa i po procedurama koje su predviđene određenim propisima.
4. Nijednu svoju odluku neće donijeti niti će glasati, a ni prećutati da javno iznesu svoj stav ukoliko im je poznato da određeni akt koji treba da se donese nije u skladu sa propisima ili da nije poštovana procedura njegovog usvajanja.

3.2. INTEGRITET

U svom djelovanju izabranici će, prema svojim znanjima i sposobnostima, samostalno donositi svoje odluke za koje su odgovorni, imajući u vidu najbolji interes svih građana i neće preuzimati financijske ili druge obaveze prema pojedincima i organizacijama koje bi za uzvrat tražile da vrše utjecaj na njih u obavljanju njihovih javnih funkcija.

3.3. NESEBIČNOST

Poštujući pravilo da mandat pripada izabranom predstavniku a ne političkoj stranci sa čije liste je izabran, izabranici će postupati u skladu sa općim interesom koji isključuje rad za financijsku dobit ili bilo koju drugu direktnu ili indirektnu korist za sebe ili lica iz svog privatnog okruženja.

3.4. ZABRANA MITA I KORUPCIJE

Izabranici ni u kom slučaju neće u obavljanju svojih funkcija primati ili davati neku naknadu, obećavati nagradu ili kakvu drugu korist ili se ponašati na bilo koji drugi način koji se može okarakterisati kao aktivno ili pasivno podmićivanje po važećim zakonima, a u vezi sa podržavanjem ili nepodržavanjem određenog akta, a naročito ako su ti stavovi suprotni Ustavu, zakonima, Statutu grada i drugim propisima.

3.5. OTVORENOST I ODNOSI SA MEDIJIMA

Izabranici će u svom djelovanju i u vezi sa odlukama koje donose uvijek biti otvoreni, blagovremeno obavještavati javnost putem sredstava javnog informisanja i nijednom svojom aktivnošću neće izbjegavati da jasno i javno saopšte svoje stavove i razloge za sopstvene odluke i ponašanja.

3.6. POŠTENJE I ODGOVORNOST

1. Izabranici će svoje dužnosti izvršavati pošteno u najširem smislu riječi i za svoje odluke i aktivnosti su odgovorni i sudu javnosti i biće uvijek spremni da se podvrgnu bilo kojoj vrsti kontrole koja odgovara njihovom položaju.
2. Osjećajući sopstvenu odgovornost izabranici neće svoju poziciju koristiti za davanje prijedloga akata ili insistirati na donošenju akata za koji znaju, ili je očigledno, da je suprotan propisima.

3.7. IZBJEGAVANJE SUKOPA INTERESA

1. Izabranici će se u svakom slučaju pridržavati odredaba Zakona o sukobu interesa i drugih zakona koji uređuju nespojivost funkcija izabranog predstavnika sa funkcijom ili položajem u lokalnoj upravi, državnom organu ili preduzećima. U svim slučajevima nastupanja sukoba interesa ili nespojivosti funkcija, izabranik će u najkraćem roku prijaviti takav slučaj i odstupiti sa pozicije.
2. Izabranik će u svakom slučaju tokom rasprave prijaviti slučaj sukoba interesa, ako se razmatra određeni akt koji treba da bude usvojen i po kome bi on, ili njegovi srodnici i prijatelji, ili pravni subjekt u kome ima financijski ili drugi interes, trebalo da ostvari kakvu korist ili privilegiju, i prilikom odlučivanja će se izuzeti od izjašnjavanja.
3. Izabranik će se uredno pridržavati zahtjeva za prijavu podataka ili davanje informacija o funkcijama koje zauzima, zanimanju i promjenama u njihovoj imovini.

3.8. UPRAVLJANJE RESURSIMA

1. Izabranik će sa najvećom pažnjom i osjećanjem sopstvene odgovornosti usmjeravati svoje ponašanje i odluke koje se odnose na financijska sredstva i upravljanje imovinom Grada isključivo u skladu sa propisima i općim interesom. Svojim ponašanjem neće dati povoda niti aktivno ili pasivno učestvovati u pripremanju ili podsticati donošenje nepravilnih odluka koje bi mogle donijeti lične koristi ili ostvarenja nečijeg privatnog interesa sa kojima su povezani financijskim ili nekim drugim interesom.
2. Izabranici ne smiju zahtijevati, primati niti davati poklone, povlastice ili druge koristi za sebe ili članove svoje porodice. Izabranici koji dobiju poklon moraju isti tretirati u skladu sa propisima Izborne komisije BiH.
3. Izabranik će se uzdržavati od svih akcija koje bi trebalo da rezultiraju izborom, imenovanjem ili postavljanjem lica na određene pozicije, a da se pri tome ne sprovedu propisi, ne obezbijedi postupak otvorene javne konkurencije, nezavisne provjere i poštovanja principa kvaliteta, profesionalnosti, znanja i sposobnosti.

4. Izabranik je dužan poštovati javna dobra i svojim ponašanjem kako u javnim tako i u privatnim nastupima treba poslužiti kao dobar primjer građanima koje zastupa.
5. Izabranik će u svakodnevnom djelovanju raditi u pravcu podsticanja i unapređenja razvoja Grada.

3.9. OBAVEZA PROFESIONALNOG USAVRŠAVANJA

U cilju što uspješnijeg obavljanja sopstvenih dužnosti, izabranik će kako samostalnim aktivnostima tako i prisustvujući seminarima, savjetovanjima i drugim oblicima edukacije, obogaćivati i usavršavati svoja znanja i sposobnosti.

3.10. IZBJEGAVANJE KUMULACIJE POZICIJA

Izabranik će u potpunosti biti posvećen ispunjavanju dužnosti koje mu pripadaju kao neposredno izabranom predstavniku, a imenovanja na druge pozicije će prihvatiti samo u onoj mjeri koja neće umanjivati njegove radne i druge sposobnosti za izvršavanja osnovnih obaveza.

3.11. UZAJAMNO POŠTOVANJE I UVAŽAVANJE

1. U međusobnoj komunikaciji i uopšte u komunikaciji sa javnošću izabranik će u svakom slučaju istupati sa uvažavanjem i poštovanjem, njegovati kulturu dijaloga, razgovjetno saopštavati svoje misli i ideje, izbjegavajući korištenje izraza koji mogu vrijeđati ili omalovažavati druge ličnosti ili grupe, na taj način poštujući jednaka prava svih na uvažavanje njihove ličnosti i uvjerenja.
2. Poštujući obaveze izabranika da su dužni prisustvovati sjednicama Gradskog vijeća i tijela čiji su članovi, a uvažavajući jedne druge, neće napuštati zasjedanje prije završetka a ni tokom trajanja, a da prije toga ne saopšte javno ili Predsjedavajućem odnosno zamjenicima razlog povremenog ili potpunog napuštanja zasjedanja. Ako su opravdanim razlogom spriječeni da prisustvuju sastancima ili sjednicama na koje su uredno i blagovremeno pozvani, Predsjedavajućeg ili zamjenike će obavijestiti o razlozima izostanka, a on će GV-e, tijelo i forum obavijestiti o razlogu izostanka pozvanog izabranika.
3. Vijećnici su dužni da se tokom sjednica Gradskog vijeća ponašaju primjereno, da sjede na svojim mjestima te da govore samo za govornicom kada im predsjedavajući ili zamjenici daju riječ.
4. U obavljanju redovne dužnosti i u javnim nastupima, izabranici paze da ne umanje lični ugled i ugled institucije koju zastupaju na način da će paziti na svoje ponašanje i pridržavati se kodeksa oblačenja.
5. Izabrani zvaničnici su dužni da u svojim diskusijama iznose samo argumentirane tvrdnje vodeći računa da njihov neargumentovano iznošenje ne ugrožava osobni integritet bilo koje osobe ili izabranog zvaničnika.
6. Izabranici će nastojati da prisustvuju javnim manifestacijama ili javnim skupovima na koje su uredno i blagovremeno pozvani u svojstvu izabranog predstavnika.

IV – SVEČANA IZJAVA

Član 4.

Izabrani predstavnici prilikom preuzimanja dužnosti daju svečanu izjavu kako je to predviđeno Poslovníkom i potpisat će posebnu izjavu o prihvatanju i obavezi poštovanja ovog Kodeksa.

V – PRAĆENJE PRIMJENE KODEKSA

Član 5.

1. Izabranici će se uzajamno podsjećati i pozivati na obaveznost poštovanja principa ponašanja utvrđenih ovim Kodeksom.
2. Predsjedavajući GV-a i zamjenici predsjedavajućeg GV-a će sa najvećom pažnjom pratiti ostvarivanje principa utvrđenih ovim Kodeksom i ovlašćuje se da u svakom momentu upozori na obavezu ponašanja u skladu sa Kodeksom, kao i da poduzme druge mjere u skladu sa Poslovníkom GV-a.
3. Izabranici će svojim aktivnostima podsticati održavanje građanskih panela u prostorijama Grada kao oblika neposrednog učešća građana u lokalnoj samoupravi, a na kojima bi građani iznosili svoja viđenja, između ostalog, i o poštovanju ovog Etičkog kodeksa.

Član 6.

1. Izabranik će biti spreman da u slučaju ustanovljenja povrede neke od odredbi ovog Kodeksa bude podvrgnut kažnjavanju, a po postupku utvrđenim ovim Kodeksom.
2. Svrha ovog kažnjavanja je javna osuda neprihvatljivog ponašanja suprotnog Kodeksu kao i moralni utjecaj na buduće ponašanje izabranog predstavnika.
3. Kazne za povredu neke od odredbi ovog Kodeksa su:
 - ukor,
 - javni ukor sa objavljivanjem izvještaja i odluke,
 - novčana kazna-paušal
 Uz kaznu ukora i kaznu javnog ukora sa objavljivanjem izvještaja i odluke može se, kao sporedna kazna, izreći i novčana kazna, u skladu sa ovim Kodeksom.

Član 7.

1. Ako se izrekne kazna ukora, kao sporedna kazna može se izreći i novčana kazna u visini od 10 % od mjesečne izabranikove naknade za period od dva mjeseca.
2. Ako se izrekne kazna javnog ukora sa objavljivanjem izvještaja i odluke, kao sporedna kazna može se izreći i novčana kazna u visini od 20 % od mjesečne izabranikove naknade za period od četiri mjeseca.
3. Novčana kazna, kao glavna kazna, izriče se u visini od 40 % od mjesečne izabranikove naknade, za period od tri do šest mjeseci. Ako je izrečena novčana kazna kao glavna kazna smatra se da je izrečena, kao sporedna, i kazna javnog ukora sa objavljivanjem izvještaja i odluke.

Član 8.

1. U cilju obezbjeđenja primjene ovog Kodeksa, GV-e formira posebnu Komisiju, Komisiju za praćenje poštivanja Etičkog kodeksa.
2. Komisija za praćenje poštivanja Etičkog kodeksa prati primjenu Kodeksa, a naročito javno iznesene primjedbe i preporuke (u bilo kom obliku), postupa po pojedinačnim prijedlozima za utvrđivanje postojanja povrede Kodeksa, podnosi izvještaj GV-u sa preporukama i ima druga ovlaštenja utvrđena ovim Kodeksom.
3. Komisija za praćenje poštivanja Etičkog kodeksa se sastoji od pet članova od kojih su dva iz reda vijećnika a tri iz reda afirmisanih građana.
4. Komisija za praćenje poštivanja Etičkog kodeksa bira predsjednika iz reda svojih članova.
5. Na rad Komisije za praćenje poštivanja Etičkog kodeksa shodno se primjenjuju odredbe Poslovnika GV-a.
6. Komisija za praćenje poštivanja Etičkog kodeksa je obavezna donijeti svoj poslovnik o radu u što kraćem roku.

Član 9.

1. Svaki građanin je ovlašten da podnese prijavu povrede Kodeksa, a u prijavi će obavezno navesti za koje radnje smatra da su povreda Kodeksa i kojim dokazima to potvrđuje.
2. Komisija za praćenje poštivanja Etičkog kodeksa razmatra prijavu i ovlaštena je da provede postupak ispitivanja osnovanosti prijave, da provede potpuni dokazni postupak i nakon toga odluči da li postoji povreda neke od odredbi Kodeksa.
3. Ako Komisija za praćenje poštivanja Etičkog kodeksa zaključi da nije bilo povrede neke od odredbi Kodeksa, o tome će obavijestiti podnosioca prijave, a GV-e će o takvim slučajevima obavještavati najmanje šestomjesečno.
4. Ako Komisija za praćenje poštivanja Etičkog kodeksa zaključi da je određeni izabranik učinio povredu neke od odredbi Kodeksa, GV-u će podnijeti detaljan izvještaj sa preporukom o izricanju određene kazne/kazni.
5. GV odlučuje o vrsti i visini sankcije na osnovu preporuke Komisije za praćenje poštivanja Etičkog kodeksa, izuzev ako sama priloži dodatno dokaze o nepostojanju povrede Kodeksa ili povrede postupka utvrđenog Kodeksom.

Član 10.

1. Kazna ukora se izvršava saopštenjem Predsjedavajućeg GV-a odnosno zamjenicima o izrečenoj kazni i dostavom primjerka odluke izabraniku prema kome je kazna izrečena.
2. Kazna ukora sa objavljivanjem izvještaja i odluke izvršava se objavljivanjem izvještaja i odluke GV-a o izricanju kazne u „Službenim novinama Grada Cazina“ i jednom od dnevnih listova.
3. Novčana kazna se izvršava dostavom odluke GV-a službi za obračun izabranikovih naknada koja će obezbjediti njeno izvršenje umanjnjem izabranikove naknade, u skladu sa tom odlukom.
4. Pri izvršenju novčane kazne bazirane na Odluci GV-a, sredstva prikupljena po ovom osnovu će biti usmjerena u humanitarne svrhe po unaprijed definiranim prioritetnim linijama.
5. O izrečenim sankcijama za povredu Kodeksa vodi se evidencija u Stručnoj službi GV-a.

VI – OBJAVLJIVANJE**Član 11.**

Svojim aktivnostima izabranici će obezbijediti promociju ovog Kodeksa u javnosti i medijima.

1. Kodeks će se objaviti u informativnom novinama Grada Cazina i kao posebna publikacija.

Član 12.

Kodeks stupa na snagu osmog dana od dana objavljivanja u „Službenim novinama Grada Cazina“.

Dostaviti:

1. Gradonačelniku,
2. Gradskom pravobraniocu,
3. Klubovima GV - 5x,
4. Službi za stručne poslove GV-a 2x,
5. Evidencija,
6. Arhiva

Predsjedavajući GV-a:
Hozanović Rifet